



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

04 նոյեմբերի 2021 թվականի թիվ 177-Ա

ք. Երևան

«ԹԻՄ» ՍՊ ԸՆԿԵՐՈՒԹՅԱՆ ՆԿԱՏՄԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով 2021 թվականի հոկտեմբերի 07-ին իր նախաձեռնությամբ հարուցված թիվ 59 վարչական վարույթի նյութերը՝ *պարզեց*.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառնություններն իրականացնելիս՝ հայտնաբերել է Օրենքի պահանջի խախտում, այն է՝ ցանցային օպերատորի գործունեություն իրականացնող «ԹԻՄ» ՍՊ ընկերության (այսուհետ՝ ցանցային օպերատոր) կողմից «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action», «Vmedia», «Vmedia+» տեսալսողական ծրագրերն առանց պայմանագրի վերահաղորդում իրականացնելու Օրենքի պահանջի խախտում:

Հանձնաժողովը ղեկավարվելով Օրենքի 32-րդ հոդվածի 1-ին մասի 14-րդ կետով և 42-րդ հոդվածով, համաձայն որի՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով և հիմք ընդունելով Հանձնաժողովի նախագահի 2021 թվականի հոկտեմբերի 07-ի թիվ 46-Ա հրամանը՝ իրականացրել է ցանցային օպերատորի մոտ մշտադիտարկում՝ տեղում դիտարկում իրականացնելու միջոցով:

Տեղում դիտարկում իրականացնելու արդյունքում 2021 թվականի հոկտեմբերի 07-ին Հանձնաժողովի ծրագրերի մոնիտորինգի և վերահսկողության վարչության կողմից կազմվել է արձանագրություն, համաձայն որի՝ ցանցային օպերատորի հեռարձակող կայանում ժամը՝ 16:30-ից մինչև ժամը՝ 17:30-ն ընկած ժամանակահատվածում իրականացված մշտադիտարկման արդյունքում պարզվել է, որ ցանցային օպերատորի կողմից վերահաղորդվում են թվով 156 տեսալսողական ծրագրեր, որոնց թվում նաև «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action» տեսալսողական ծրագրերը:

Արձանագրությամբ նշված տեսալսողական ծրագրերի և ցանցային օպերատորի կողմից 2021 թվականի սեպտեմբերի 09-ին գրությամբ Հանձնաժողով ներկայացված վերահաղորդվող տեսալսողական ծրագրերի ցանկի համադրության արդյունքում պարզվել է, որ ցանցային օպերատորի կողմից վերահաղորդվում են «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action» տեսալսողական ծրագրերը, որոնք բացակայում են վերջինիս կողմից ներկայացված տեսալսողական ծրագրերի ցանկից:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով՝ 2021 թվականի հոկտեմբերի 07-ին ցանցային օպերատորի նկատմամբ հարուցել է վարչական վարույթ՝ հիմք ընդունելով Հանձնաժողովի ծրագրերի մոնիտորինգի և վերահսկողության վարչության կողմից ցանցային օպերատորի գործունեության մշտադիտարկման արդյունքների հիման վրա 2021 թվականի հոկտեմբերի 07-ին կազմված մշտադիտարկման իրականացման և արդյունքների վերաբերյալ արձանագրությունը, որն Օրենքի 42-րդ հոդվածի 18-րդ մասի համաձայն՝ հիմք է հանդիսանում վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Հանձնաժողովը հարուցված վարչական վարույթի մասին 2021 թվականի հոկտեմբերի 11-ին ծանուցել է ցանցային օպերատորին և հայտնել, որ այս հարցի վերաբերյալ կարող են իրենց պարզաբանումները, բացատրությունները, ինչպես նաև վերոնշյալ տեսալսողական ծրագրերի և «Vmedia», «Vmedia+» տեսալսողական ծրագրերի («Վիվատո մեդիա» ՍՊԸ) վերահաղորդման իրավական հիմքերը ներկայացնել Հանձնաժողով:

Ցանցային օպերատորը մինչև վարչական վարույթի քննարկումը որևէ պարզաբանում, բացատրություն և նշված տեսալսողական ծրագրերի իրավական հիմքերը Հանձնաժողով չի ներկայացրել:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Համաձայն Օրենքի 32-րդ հոդվածի 1-ին մասի 14-րդ կետի՝ Հանձնաժողովն՝ իրականացնում է Հեռարձակողների և օպերատորների գործունեության մշտադիտարկում:

Օրենքի 42-րդ հոդվածի 1-ին, 3-րդ և 18-րդ մասերը սահմանում են .

«1. Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով: Ուղղակի դիտարկման արդյունքները կարող են համադրվել տեսալսողական հաղորդումների հաշվառման էլեկտրոնային մատյանների տվյալներին:

3. Տեսալսողական մեդիայի մասին օրենսդրության պահանջների խախտման վերաբերյալ տեղեկություններ ունենալու դեպքում օպերատորի գործունեության տեղում դիտարկումն իրականացվում է կարգավորող պետական մարմնի նախագահի հրամանի հիման վրա:

18. Մշտադիտարկման արդյունքների վերաբերյալ արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայել որպես վարչական վարույթի ապացույց»:

Օրենքի 49-րդ հոդվածի 1-ին մասի համաձայն՝ Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Օրենքի 49-րդ հոդվածի 5-րդ մասը սահմանում է.

Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմին:

Օրենքի 60-րդ հոդվածի 8-րդ մասի համաձայն՝ Օրենքն ուժի մեջ մտնելուց հետո ցանցային օպերատորները կարգավորող պետական մարմին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

Հանձնաժողովի կողմից ուսումնասիրվել են վարչական վարույթի նյութերը և առաջնորդվելով ինչպես գործում առկա, այնպես էլ ներկայացված ապացույցներով, ուսումնասիրության արդյունքում Հանձնաժողովն ամրագրում է, որ ղեկավարվելով Օրենքի 49-րդ հոդվածի 5-րդ մասի և 60-րդ հոդվածի 8-րդ մասի դրույթներով՝ Հանձնաժողովը 2021 թվականի սեպտեմբերի 08-ին թիվ 04-795 գրությամբ Հայաստանի Հանրապետությունում ցանցային օպերատորի գործունեություն իրականացնող բոլոր ընկերություններին, այդ թվում «ԹԻՄ» ՍՊ ընկերությանն առաջարկել է ցանցային օպերատորի կողմից վերահաղորդվող տեսալսողական ծրագրերի ամբողջական ցանկը թղթային և էլեկտրոնային տարբերակով ներկայացնել Հանձնաժողով: Ցանցային օպերատորի կողմից 2021 թվականի սեպտեմբերի 09-ին գրությամբ Հանձնաժողով է ներկայացվել վերահաղորդվող տեսալսողական ծրագրերի ցանկերը:

Հանձնաժողովը որպես տեսալսողական մեդիայի ոլորտը կարգավորող պետական մարմին Օրենքով վերապահված իր վերահսկողական լիազորություններն իրականացրել է ցանցային օպերատորի գործունեության մշտադիտարկում՝ տեղում դիտարկում իրականացնելու միջոցով և դիտարկման արդյունքում 2021 թվականի հոկտեմբերի 07-ին կազմված արձանագրությամբ նշված տեսալսողական ծրագրերի և ցանցային օպերատորի կողմից Հանձնաժողով ներկայացված վերահաղորդվող տեսալսողական ծրագրերի ցանկերի համադրության արդյունքում արձանագրել է, որ ցանցային օպերատորի կողմից վերահաղորդվում են մի շարք («Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action») տեսալսողական ծրագրեր, որոնք բացակայում են վերջինիս կողմից ներկայացված տեսալսողական ծրագրերի ցանկերից:

Հանձնաժողովի կողմից ուսումնասիրվել են վարչական վարույթի նյութերը, որոնք համադրվել են Հանձնաժողովի տեղում դիտարկման արդյունքներին, ներկայացված տեսալսողական ծրագրերի ցանկին և հայտնի է դարձել, որ ցանցային օպերատորն իր գործունեությունն իրականացնում է՝ խախտելով Օրենքի 49-րդ հոդվածի 1-ին մասի պահանջը:

Վարչական վարույթի նյութերի ուսումնասիրության արդյունքում Հանձնաժողովն արձանագրում է նաև, որ մինչև վարչական վարույթի քննարկումը ցանցային օպերատորը Հանձնաժողովի կողմից պահանջվող «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action», «Vmedia», «Vmedia+» տեսալսողական ծրագրերի («Վիվառո մեդիա» ՍՊԸ) վերահաղորդման իրավական հիմքերը չի ներկայացրել:

Այսպիսով, վարչական վարույթի նյութերի ուսումնասիրության արդյունքում ամրագրում ենք, որ Օրենքի 49-րդ հոդվածի 1-ին մասով ցանցային օպերատորի լիցենզիա ստացած անձի

համար պարտավորություն է սահմանված Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը վերահաղորդել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Փաստում ենք նաև, որ լիցենզիա ստացած ցանցային օպերատորը վերահաղորդում է տեսալսողական ծրագրեր և պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ օրենքի դրույթները խախտելու դեպքում կրել պատասխանատվություն օրենքով սահմանված կարգով, ուստի, օրենքի պահանջի չկատարումն ինքնին բերում է պատասխանատվության:

Ցանցային օպերատորը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելը առաջացնում են իրավական հետևանքներ և ցանցային օպերատորը պատասխանատվություն է կրում տեսալսողական մեդիայի ոլորտը կարգավորող օրենսդրության կիրառման ապահովման համար և տվյալ դեպքում ցանցային օպերատորը պարտավոր էր պահպանել Օրենքի 49-րդ հոդվածի 1-ին մասով սահմանված դրույթի պահանջը:

Հանձնաժողովի կողմից 2021 թվականի նոյեմբերի 04-ին անցկացված վարչական վարույթի քննարկման նիստին ներկա էին ցանցային օպերատորի ներկայացուցիչները, ովքեր նիստի ժամանակ գրությամբ ներկայացրել են ցանցային օպերատորի բացատրությունները, համաձայն որի՝ «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action» տեսալսողական ծրագրերը 2021 թվականի հոկտեմբերի 06-ին ավելացվել են Թիմ Թիվի (Team TV) հավելվածի միջոցով վերահաղորդվող տեսալսողական ծրագրերի ցանկում, որի վերաբերյալ, ի թիվս այլ փոփոխությունների Հանձնաժողովը տեղեկացվել է 2021 թվականի հոկտեմբերի 13-ի թիվ 21 գրությամբ՝ Օրենքի 49-րդ հոդվածի 5-րդ մասի պահանջների պահպանմամբ: Ցանցային օպերատորի ներկայացուցիչները Հանձնաժողովին ներկայացրել են նաև 2021 թվականի ապրիլի 01-ին կնքված «Rai 1» և «Rai News 24» տեսալսողական ծրագրերի, 2021 թվականի հուլիսի 01-ին կնքված «Viasat History», «TV 1000 Русское Кино», «TV 1000», «TV 1000 Action» տեսալսողական ծրագրերի և 2021 թվականի հոկտեմբերի 21-ին կնքված «Vmedia», «Vmedia+» տեսալսողական ծրագրերի վերահաղորդման իրավական հիմքերը (պայմանագրերը), ինչպես նաև «Vmedia», «Vmedia+» տեսալսողական ծրագրերի դիստրիբյուտորի («ՎԻՎԱՌՈ ՄԵԴԻԱ» ՍՊԸ) հետ 2021 թվականի սեպտեմբերի 30-ին կնքված համաձայնագիրը, համաձայն որի՝ դիստրիբյուտորը ցանցային օպերատորին տրամադրում է նշված տեսալսողական ծրագրերի վերահաղորդման իրավունք՝ անհատույց փորձնական թեստավորման նպատակով՝ 2021 թվականի հոկտեմբերի 01-ից մինչև հոկտեմբերի 21-ն ընկած ժամանակահատվածի համար:

Նիստի ընթացքում Հանձնաժողովի կողմից ուսումնասիրվել են վարչական վարույթի մասնակցի կողմից ներկայացված նոր փաստերը և պայմանագրերը, որոնք համադրվել են գործում առկա ապացույցների հետ և «Տեսալսողական մեդիայի մասին» օրենքի խախտում չի հայտնաբերվել:

Այսպիսով, հաշվի առնելով այն փաստը, որ տեղում դիտարկման արդյունքում պարզվել է, որ ցանցային օպերատորի կողմից վերահաղորդվում են «Rai 1», «Rai News 24», «Viasat History», «TV 1000 Русское Кино», «TV 1000», «TV 1000 Action», «Vmedia», «Vmedia+» տեսալսողական ծրագրերը, իսկ ցանցային օպերատորի կողմից նշված տեսալսողական ծրագրերի

վերահաղորդումն իրականացվում է վերահաղորդման իրավունքի տրամադրման պայմանագրերի հիման վրա, ուստի վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով ցանցային օպերատորի նկատմամբ հարուցված թիվ 59 վարչական վարույթը ենթակա է կարճման:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից, ղեկավարվելով «Տեսալսողական մեդիայի մասին» օրենքի 49-րդ հոդվածի 1-ին և 5-րդ մասերի, 60-րդ հոդվածի 8-րդ մասի դրույթներով և հիմք ընդունելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց.**

1. Կարճել «ԹԻՄ» ՍՊ ընկերության նկատմամբ հարուցված թիվ 59 վարչական վարույթը:

2. Սույն որոշումն ուժի մեջ է մտնում այն «ԹԻՄ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ՝**

Տ. ՀԱԿՈԲՅԱՆ

04 նոյեմբերի 2021թ.

ք. Երևան